



CHRËSCHTLECH-SOZIAL
VOLLEKSPARTEI
SECTIOUN MUNNERËF-DUELEM

CSV Stellungnahm zum Gemenge-Budget 2018

Mat engem Iwwerschoss vun knapp 6,3 Mio. EUR am Uerdentlechen-Budget 2018 kann een roueg soen datt déi finanziell Situatioun vun der Gemeng Mondorf ausseruerdentlech gudd ass an datt d'Recettesäit vum ordinären Budget mat engem Zouschoss vun 12,5 Mio. EUR aus dem Fonds de dotation globale des communes an de Casinostaxen vun knapp 3,9 Mio. EUR nët nëmmen eng gudd Stabilitéit opweist mä esouguer liicht no uewen weist.

Mir machen hei Abstraktioun vun denen knapp 1,8 Mio. EUR, déi d'Gemeng vum Educatiounsministère kritt fir Containeren fir den Mondorfer Lycée opzeriichten – et ass en duerchlaafenden Posten deen och fir 1,8 Mio. EUR op der Dépensensäit steet. Et giff eis awer interesséieren wou déi Containeren hinstoen kommen – wëll se einfach op déi gréng Wiss ze stellen an ufänken Schoul ze haalen – daat kënnen mir eis nët esou direkt vierstellen.

Weider interesséiert et eis wéi wäit d'Verhandlungen mat den Propriétaires vun den Terrain'en um Gremëlter fortgeschratt sin?

Déi finanziell Situatioun vun der Gemeng ass wéi gesot gudd a mir kënnen roueg d'Zukunft préparéieren an Mondorf als Thermalstaadt mat engem räichhaltegen Touristengebued an als attraktiv Geschäftsstaadt an der Groussregion positionnéieren. Mat deene allermeeschten Positiounen am ausseruerdentlechen Deel vum Budget hunn mir keen Problem an mir kënnen se och mat droen.

Allerdéngs hoffen mir datt nach en detailéierten Finanzplang fir dës Investitiounen nokënn an datt d'Majoritéit eis Opschloss gëtt iwwert déi sécherlech nët ze negligéierend Nofollechkäschten. Ëmmerhin war et laangzäit d'Positioun vun der DP an „déi gréng“ fir sech géint beispillsweis den Bau vun enger neier Schwämm auszedrücken.

Mir wëllen hei déi folgend Posten aus dem ausseruerdentlechen Budgetsdeel ernimmen, déi mir och ënnerstëtzen – et sinn daat:

- D'Neigestaltung vun der Frantz Clementstrooss mat 2,6 Mio. EUR
- D'Infrastrukturaarbechten fir den Lycée mat knapp 2,4 Mio. EUR, déi mir jo och vum Educatiounsministère erëmkreien
- Den Kaaf vun weideren Terrainen am Sënn vum Uleeën vun enger Réserve foncière mat 2,0 Mio. EUR
- Den Scoutschalet um Badbëchelchen mat 1,5 Mio. EUR
- Den Complexe sportif Gremëlter mat knapp 1,3 Mio. EUR
- D'Antihéichwaassermesuren mat knapp 1,0 Mio. EUR wann een d'Mauer laansch d'Gander mat arechent
- D'Astandsetzen vun de Kierfechter an der Morgue zu Elleng mat 810.000 EUR
- D'Renovatioun an d'Mise en conformité vun den Gemengeneegenen Heiser mat 750.000 EUR
- An dann selbstverständlech och déi aner Infrastrukturaarbechten an Astandsetzungen vun deenen aneren Stroossen, besonnesch zu Altwies an zu Munnerëf, esou wéi och d'Schaafen vun neien Parkingen.

An dësem Kontext wëllen mir awer d'Ureegung ginn, ob et nët esou lues un der Zäit wier all déi Investissementer déi getätegt ginn an goufen mat Hëllef vun engem IFRS Bilan evaluéieren zu loossen, fir esou den Memberen vum Gemengerot an den Bierger dobaussen och am Sënn vun der Transparenz ze weisen, wéi wertvoll déi Investissementer an Infrastrukturen nach sinn déi an deenen läschten Jorzengten getätegt goufen. An Däitschland ginn et Gemengen, oder Kommunen wéi se déisäit der Musel soen, déi daat maachen geloss hunn, och am Sënn vun engem käschendeckenden Waasserpräis, wou mir nach ëmmer fir en Waasserinfrastrukturfong plädéieren, deen een sech vum Intérieur selbstverständlech genehmegen misst loossen, deen awer den Virdeel hätt, datt een spéider noutwendeg Investitiounen an d'Waasser resp. Ofwaasserinfrastrukturen laangfristeg geplangt an firfinanziert hätt.

Am virleidenen an ze diskutéiernden Budgetsprojert vermëssen mir awer och eng Rei vun Punkten, déi eis awer wichteg fir d'Zukunft vun eiser Gemeng schéngen. Et sinn dëst:

- D'Iwwerleeung fir en fixen Recycling Center ze bauen zesummen mat engem neien Service Technique
- D'Iwwerleeung fir mat enger grousser Abenteuerspillplaz fir Munnerëf eng weider Attraktioun ze schaafe
- D'Iwwerleeung fir zesummen mam Domaine Thermal um Site vun der aler Piscine eng grouss Weieranlag ze plangen, déi esouwuel als Waasserréckhalteméiglechkeet wéi och als touristesch Attraktioun ziele kënn
- En Konzept mat Mesuren fir eis Geschäftswelt nei ze beliewen an engem strategeschen Usaz deen hier Emetzung zielführend giff beschreiwen
- En kommunalt Verkéierskonzept wat den reellen an zukünftigen Begiewenheeten – Stéchwuert Projet „Hinter der Kirch“ Rechnung dréit

Et sinn dëst alles Punkten, déi nët an engem Joer, vläicht och nët an enger Legislaturperiod realiséiert kënnen ginn, an duerfier ass et wichteg mat Zäiten unzufänken dës Iwwerleeungen ze maachen.

Mir hunn den „Pour“ an de „Contre“ analyséiert, an mir sinn zur Conclusioun komm, datt mir hei fir 2018 en Iwwergangsbudget virleien hunn, wou eng Reih vun gudden Usätz drann stinn wou awer nët all fir Mondorf wichteg Zukunftsorientéierungen dran stinn. Dovir hunn mir eis entscheed eis beim Vote ze enthaalen. De Budget rectificé 2017 stëmmen mir nët – mir hunn de Budget initial jo och nët matgestëmmt.

Sëcherlech ginn et elo Leit, déi mengen den Budget wier eis nët emol eng Nee-Stëmm wert gewierscht – et kënn een et awer och positiv gesinn an soen d'Glas wier hallef voll.

Et kënn ëmmer op déi politesch Absicht un wann een esou en Vote kommentéiert.

An deem Sënn ob eng gudd zukünfteg Zesummenarbecht.

Mondorf, den 14. Dezember 2017

CSV Fraktioun am Mondorfer Gemengerot